

欽定剿平三省邪匪方略

正編

十五

卷之二

卷之二

卷之二

卷之二

卷之二

卷之二

卷之二

卷之二

卷之二

欽定剿平三省邪匪方略正編卷二十三 丙辰年

十二月初三日 甲戌 景安奏言連日探得永保等

帶領大兵由葉家店一路追剿賊匪向西奔竄

至竹簫舖旋復折而北向在襄陽穀城光化三

縣交界地方屯聚距豫省鄧州內鄉交界祇三

四十里 臣 思豫省邊境一帶地面遼濶兼之無

險可據賊匪竄徙無定處處均須設備查新店

鋪係新野縣門戶南通呂堰驛路賊匪屢經窺

伺甚爲緊要又鄧州西南三尖山一座路通浙

川內鄉二縣而浙川曾有辦過邪教之案且與

伏牛山毗連綿亘數百里設被賊匪潛竄勾結

愈難搜剿臣隨將前調來河北之山西兵分駐

新店鋪五百名三尖山五百名嚴飭將弁實力

堵禦其鄧州南界之魏家集都司衙孟家樓等

處東西百餘里臣止有本省兵五百名分撥三

處嚴防現在永保與恒瑞等各分兵六千餘名

一路由神馬寺祖師殿一帶自南追擊一路由

薛家集石橋一帶自北截剿兩路兵力極其壯

盛且西南有襄江阻隔諒可尅期殲滅臣督率

文武員弁鼓勵兵勇於沿邊一帶極力堵截如

有剿敗餘匪竄及邊境立即擒拏一面往來曉

諭居民令各安業民情尙屬寧定再查三尖山
迤南之老河口聞有總兵德齡帶兵在彼把守
重重攔截似可無虞竄越奏入報

聞

初六日丁丑宜綿秦承恩柯藩奏言查將軍山地

方係前代用兵時據險劄營之所在漢江北岸
距興安府城三十餘里後連洵陽鎮安從南山

小路直達西安省城最關緊要不可不急爲剿

辦臣等密派精細弁兵帶領土人確探路徑山

之南面三峯蟬聯而下前峯唐家塢爲賊頭卡

中峯爲賊二卡最後一峯爲將軍山陡峭如塔

賊人據爲巢穴山之東西北三面皆係巉巖峭

壁難以進攻淮南面山脚下有石磴小路一條

可以攀援而進但其上有石坎三層各高丈餘

賊匪於墻內所留鎗眼向下瞭望甚爲扼要又

於山下東西北三路各屯聚多人設卡抵禦亦

甚嚴密臣等於二十日派撥官兵分爲四路臣

柯藩督率前行臣宜綿臣秦承恩隨後繼進二

十一日寅刻臣柯藩率領遊擊海洪阿都司巴

燕孟克張應魁帶兵六百名同州府知府朱勳

帶領爬山鄉勇三百名潛抵唐家墻因大霧迷

漫賊人不覺我兵一擁而上賊匪勢不能支退

回二卡我兵乘勢追殺殲賊三百餘人遂將二

卡登時攻克時遊擊李昌都司薛大烈帶兵五

百名亦由東路攻破黑虎塘賊卡殺賊二百餘

人與前路之兵合爲一處俱由山南小路向上

攻撲賊匪隱蔽石坎之內放鎗擲石兵丁溫可

順彭可易等貼身崖石間攀援而上擲石擊死

賊匪二人因衆寡不敵被矛身死其時遊擊李
逢春韓以明帶兵五百名由西路攻破包家堖
賊卡佐領西林布遊擊托克托布永明帶兵五
百名由北路攻破箭梁山賊卡各殺賊數十人
及百餘人不等合爲一處由山後奮力上攻賊
匪鎗石齊發我兵鼓勇前進有外委牛本漢直
上高崖拋擲火彈草房登時火起該外委爬牆

欲進猝中賊矛而墜外委蘭和亦越至墻根破

賊匪推倒墻屋壓斃兵丁亦有傷亡臣等正在

焦急隨於拏獲活賊內訊明山上無泉須向山

溝取水臣等公同商酌斷賊汲道令其困渴再

用大礮轟摧卽密飭李逢春薛大烈將東西兩

路水道掘壕立柵嚴防偷汲是夜果有賊匪連

次撲搶下山被我兵施放鎗箭殺斃一百餘人

勺水未能偷漏一面派令安弁連夜趕運大神

礮二尊到山臣柯藩密諭遊擊海洪阿等帶領

奮勇弁兵潛伏溝內俟轟破賊牆卽乘烟焰前

進奪取頭層石卡二十二日辰刻初放兩礮賊

人潛匿不動及轟開石墻賊匪始行慌亂海洪

阿李逢春等率領弁兵從溝內突出飛身騰躍

冒烟直進各殺斃數人及十數人賊匪不能抵

敵遂將頭二三各卡拋棄奔歸大寨各路官兵

奮力齊上賊匪自知必死一齊撲下我兵鎗箭

齊發殺斃賊匪數百人餘匪仍逃回大寨將滾

木插石推下我兵立脚不住

臣

柯藩一面趕調

礮位在賊人安卡處所對山攻打一面留心瞭

望見寨旁林內有青布帳房數架賊人出入梭

織不絕必係賊首潛匿在內隨飭趕運大礮密

令外委劉滿貴緊對賊帳點放礮聲一起林內
帳房掀掣飛去打中賊首馮得祿趙可徵二犯
屍身皆拋擲數丈而墜大寨房屋亦同時轟倒
賊衆滿山奔竄哭聲震天遂拋擲器械下山一
一就縛共一千八十二人並無一名漏網解回
郡城逐一審訊查馮得仕一犯首先倡亂大逆
不道取供後卽將該犯凌遲處死並梟首犯事

地方示衆其餘賊匪訊係放鎗擲石抗拒官兵

之人悉行處斬惟查有被裹良民並未與官兵

抵敵者未便概予駢誅飭令各鄉保查明具領

嚴加管束其所獲刀矛礮位貯存備用糧石等

項賞給鄉勇人等分領再查安康縣境內尚有

青山溝埡駝家壩松樹壩越海溝四處賊匪每

處屯聚自四五百人至七八百人不等經

臣等

卷之三
三
派委叅將雷仁都司關聖保毛伏及候補道周
世紹候補知府趙洵知縣莊振朱錦昌等帶領
兵丁鄉勇分投剿殺拏獲賊首宋之仁吳漢東
陳國律張聖宗等悉行正法其陣亡受傷弁兵
鄉勇及在事出力文武員弁現在查明咨部辦
理內有尤爲奮勇殺賊者另繕清單恭呈

御覽惟查洞汝河之賊勢頗猖獗鎮臣素寶英阿現

剿米溪之賊不能兼顧臣宜綿柯藩仍須統兵

前往剿洗一經竣事卽由紫陽直赴太平會同

英善殲洗達州一帶逆匪

同日英善勒禮善奏言臣等前次攻克柏樹場

等處賊巢匪衆盡數遁入橫山子一帶連日搜

捕餘匪肅清後路公同籌議進攻查該匪等現

踞橫山子茅坪張家觀等處山梁地勢險峻復

於橫山子登山要路設立賊卡三座外挖濠溝
負嵎固守必須出其不意方能奪據十一月二
十日大霧迷漫鎮臣袁國璜督率員弁兵勇潛
至賊人頭卡左近該匪等尙未知覺四面圍繞
鎗礮齊發又拋入火彈將賊卡草棚燒燃匪衆
情急外奔俱被我兵攔截殲戮維時橫山子頂
梁屯聚賊匪前來迎敵適鎮臣何元卿帶領將

弁及滿漢屯土官兵隨後趕至一呼直上搶據

橫山子山梁燒燬賊卡二座生擒賊匪二十三

名俱卽正法梟示陣亡都司高傑一員該匪等

因橫山子係茅坪障蔽不肯捨去乘我兵營卡

尙未紮定於二十一日卯刻率同黨夥三四千

人分路蜂擁而來袁國璜何元卿督率將領兵

勇悉力堵禦施放鎗箭加以大礮轟擊斃賊多

名始行退去生擒賊匪十二名二十二日寅刻
該匪等復率五六千人分作五路拚命直撲袁
國璜何元卿率同滿漢將領督兵抵敵臣等帶

領兵勇隨後策應鎗礮弓箭齊發殲斃二三百

人詎該匪等續有接應愈聚愈多我兵悉力攻

擊賊匪退而復前者數次迨至申刻我兵因連

戰三日稍形疲乏袁國璜何元卿奮不顧身督

率士卒向前搶撲不料深入重地俱被賊匪戕

害實堪痛惜都司百壽守備石陣圖黃塘鹽大

使季基土都司納撒布屯把總郎太等亦俱殺

賊陣亡署協領努赫稜叅將盧廷璋身帶刀矛

各傷兵勇均有陣亡臣等督率文武員弁竭力

將賊擊退伏查楚省邪氛尙未蕩洗臣等本擬

就現在兵勇設法攻剿無如實在兵單賊衆而

豐城場及太平縣屬各邪匪俱未殲除宜綿又
在興安一帶剿賊勢難尅日統兵來川臣等不
勝焦急愧憤之至是以遵

旨知會將軍觀成帶兵速來督剿並知會福寧商辦
惟觀成帶兵多寡亦難懸定查成都駐防兵丁
現在省城尙有一千三百餘名又精壯閑散八

百多人

臣

等公同商調馬甲一百名步兵二百

名閑散二百名星速來營以資協剿俾得速行
藏功省城尙存駐防滿兵及精壯閑散計有一
千數百名臣英善復飭省標各營添募新兵操
演技藝自可足資捍衛均奏入

上命軍機大臣傳諭宜綿勒保英善曰此次宜綿等
統領官兵分路進攻斷賊汲道並用礮轟開賊匪
石墻乘勢直進殺斃賊匪數百人餘匪情急下山

投順一一就縛共一千八十餘人所辦可嘉宜綿
秦承恩柯藩著賞給洋鑲瑪瑙盒各一個其帶兵
出力文武員弁除遊擊韓加業等已照所請加恩
外其餘遊擊李昌韓以明托克托布永明都司薛
大烈佐領西林布千總米章外委薛和馬存俱著
以應陞之缺酌量陞用其武舉朱承受著以千把
酌補此次打仗兵丁著各賞一月錢糧以示鼓勵

外委牛本漢藺和兵丁溫可順彭可易攀陟先登

受傷陣亡殊屬可惜著咨部優卹其餘傷亡兵丁

亦著查明咨部賞卹又據奏安康縣境內尙有青

山溝壩駝家壩四處賊匪屯聚又紫陽縣汝洞二

河均有賊匪宜綿柯藩仍須統兵前往剿辦俟事

竣卽由紫陽直赴太平等語本日據英善等奏官

兵於攻克橫山子賊卡後賊匪失去巢穴障蔽分

作五路前來攻撲官兵連戰三日總兵袁國璜何
元卿督率士卒直前深入因衆寡不敵致被戕害
都司百壽等亦俱殺賊陣亡該處匪徒膽敢糾衆
戕官實爲可惡必須上緊剿捕現在達州一路總
兵二員同時被戕帶兵都守等又復陣亡官兵未
免氣餒而英善勒禮善從來未經軍旅恐一時不
得主見必須另簡大員前往督辦現在湖北黃柏

山一路剿賊正當喫緊之時昨已令惠齡先赴光
化一帶總統軍務福寧觀成未便再離該處且黃
柏山距達州路遠一時亦不能趕到宜綿前在鄖
西剿捕教匪辦理均合機宜昨有旨令伊赴商州
鄖西一帶堵剿今達州剿賊尤關緊要而安康境
內青山溝等處及紫陽之賊不過零星匪黨現有
柯藩索費英阿足數分剿著傳諭宜綿不必拘泥

昨旨再赴商州如接奉此旨時紫陽賊匪全行剿

淨柯藩索費英阿俱卽同赴達州剿賊如紫陽之

賊搜捕畧須時日卽令柯藩索費英阿暫留該處

俟剿賊完竣再行前往興漢一帶亦關緊要秦承

恩仍遵前旨在彼駐劄彈壓截拏餘匪並董率叅

將雷仁等將安康境內青山溝等處之賊搜剿淨

盡宜綿卽迅速先赴達州調度一切宜綿未到之

先英善等當倍加鎮定不必曷昧深入祇須分派

官兵四面圍堵毋使他竄以便宜綿到彼熟籌進

剿又據英善等奏於成都駐防精壯閑散內調往

五百名宜綿現帶之兵亦可酌量先行帶往以資

攻剿倘兵力尙有未敷宜綿係陝甘總督該二省

官兵皆其所轄不妨酌量就近添調應用所有重

慶興漢二鎮員缺已明降諭旨將馬龍艾如文簡

放其自湖南軍營因差來京引見之副將玉柱等

十二員俱係屢經行陣之員現已飭令與馬龍一

併馳驛前赴達州軍營帶兵更有多人可資得力

宜綿務當妥爲佈置督率各員迅速進攻將達州

太平東鄉等處首夥各犯悉數殲擒至總兵袁國

璜何元卿帶兵殺賊奮不顧身實堪軫惜著咨部

照提督例議卹伊子俟服闋後送部引見都司高

傑百壽守備石陣圖黃塘鹽大使季基土都司納

撒布屯把總郎太亦因殺賊陣亡均著咨部加一

等議卹其餘傷亡官兵著查明咨部分別優卹再

剿辦達州賊匪雖已令宜綿迅速馳往但該處太

平東鄉皆有賊匪滋擾恐一人未能兼顧勒保現

往湖南軍營著於途次接奉此旨卽取道馳赴四

川達州會同剿辦至黃柏山一路賊匪著福寧觀

成上緊剿淨拏獲首逆林之華覃加耀後伊二人
內酌量一人在彼搜捕餘匪一人卽帶領將弁回
川速赴達州會剿更可迅速集事

上又命軍機大臣傳諭陸有仁曰現在四川達州教
匪尙未剿淨宜綿親往督辦甘省秦州鞏昌一帶
均與川省毗連不可不加意防範著陸有仁卽飭
令該地方官嚴密堵截毋任餘匪竄入亦不可稍

涉張皇致滋擾累

奏官兵將將軍山等處賊匪全

上諭內閣曰宜綿等奏官兵將將軍山等處賊匪全
行剿滅查明在事出力文武員弁并雇募鄉勇剿
殺賊匪之職員武生等開單呈覽遊擊韓加業海
洪阿李逢春知府朱勲俱著賞戴花翎守備李殿
元千總周奉陳尙賢知縣莊振朱錦昌外委劉滿
貴俱著賞戴藍翎捐職州同裘文祿捐職縣丞何

第...卷三
紹衣朱儀軾均著照本銜選用武生黃三元著以
把總留營補用以示獎勵

初七日 戊寅 永保恒瑞慶成舒亮奏言查黃龍墻

賊匪屢經官兵剿殺數月以來往往恃其路徑

熟悉潛由無兵處所急竄奔逃而楚北地方遼

濶路路可通官兵實有不能四面密圍之勢 臣

等隨時籌度相機分布現因賊匪西竄其勢欲

奔光化臣等先派總兵德齡帶兵一千名繞賊

之西於光化老河口一帶堵截其豫省邊界景

安雖派撥官兵一千五百名擇要堵截而路徑

甚多兵力稍單臣等公同商酌臣恒瑞舒亮碩

雲保阿爾薩朗總兵富成等帶領健銳營西安

山東滿漢官兵六千餘名取道豫省邊界在賊

之東北一帶向西兜截進剿臣永保慶成訥音

巴克坦布總兵明泰德光王文雄帶領火器營

直隸陝西河南滿漢官兵六千各自賊之東南

兜剿兩路夾擊俾無去路臣恒瑞等分路後於

二十八日帶兵由葉家店兜截至竹林橋賊匪

適竄至蠻張家集一帶因光化已設兵堵禦正

欲向北奔逃臣恒瑞舒亮碩雲保卽帶領馬兵

先行迎往衝擊阿爾薩朗富成督率步隊隨後

接應賊匪卽排列岡嶺据險抗抵官兵施放鎗礮馬兵抄繞衝擊殲斃賊匪多名賊勢稍退

臣

永保慶成納音巴克坦布明泰德光王文雄等各分帶馬步官兵由清河店進發亦於是日抵趙家集卽自蠻張家集南面進剿詎賊匪見官兵夾擊分爲前後兩路排列抵拒該處岡嶺重沓溝塹極多賊匪易於躲閃維時天色向晚兩

路官兵均未撤隊逼近拏卡守住臣永保慶成

連夜差人繞路知會臣恒瑞舒亮次日黎明併

力夾擊臣恒瑞舒亮碩雲保自北帶領巴圖魯

侍衛丑保等滿漢馬兵進逼賊屯臣永保慶成

納音副都統銜六十七自南帶領巴圖魯侍衛

哲克等滿漢馬兵抄繞賊屯之後一時鎗箭齊

發賊衆紛紛敗竄臣等各督催官兵奮力夾擊

兩路步兵亦各分路攻剿該匪急思兔脫一面

與官兵分頭抗拒一面提男挈女復又向東北

奔逃兩路官兵併力兜截追殺二十餘里賊匪

沿途拋棄行李包裹器械騾馬無數傷斃賊匪

約有一千餘名餘衆豕突狼奔四散逸去旋復

彼此呼叫仍歸一處實堪痛恨

臣

恒瑞舒亮現

由北路上薛家集一帶抄截迎頭攻剿

臣

永保

慶成等抄繞賊之東南兜截賊匪勢已窮感因

現無行李更不少停兼之左截右避並無一定

去向總因首逆未獲之故臣等惟有扼要攔截

遏其他竄之路兩路官兵漸逼漸緊務期及早

集事擒獲首逆查有探路鄉勇王上達王名達

屢次隨同臣慶成引路殺賊實屬奮勇出力曾

酌給把總職銜茲於二十九日兄弟同時陣亡

情實可憫可否量加議卹之處出自

聖恩謹將^臣等各路兜截賊匪方向繪圖粘簽恭呈

御覽

同日汪新奏言^臣前馳往隨州親赴各隘履勘

連日周歷西北隘口如最要之隨陽店吳山店

唐縣鎮三處次要之大碑店雙河等處均經安

設兵勇聲勢聯絡^臣復逐加申警多方策勵

內探聞賊匪於十一月初六七等日經官兵痛
剿業已震驚軍威並續獲奸細李廷華據供賊
首因知隨州先已有備不敢徑向東竄現在賊
營距隨俱在百數十里之外復圖竄向黃龍壩

一帶等情

臣

思賊匪甫經剿敗勢甚窮蹙感永保

恒瑞等督兵兜剿自必立就殲除所有防守隨
州事宜仍飭前派駐守之漢黃道張道源德安

府知府盛德昌會同督標左營遊擊王恒輝加
意嚴防期無他患均奏入

上命軍機大臣傳諭宜綿永保恒瑞慶成舒亮曰賊
匪前竄黃龍塢復自滾河偷渡向西奔逸此次永
保等兩路繞截雖追殺二十餘里殲斃多名仍未
能四面圍堵任賊逃竄其光化一帶幸有官兵堵
截賊匪不能西竄但閱圖內迤東一帶地方遼濶

尙無防堵之兵永保等何以並未預計及此倘賊
匪見西南北三面皆有官兵堵截復乘間向東逃
竄仍至黃龍壩等處糾衆抗拒必致官兵往來追
剿又形疲乏永保等自思當得何罪總因首逆未
擒屢致竄逸勾結劉之協姚之富自必潛在一處
主謀指使是以四散之賊仍復招呼歸一必須將
賊首先行拏獲其餘匪黨可不攻而潰永保等所

到地方豈無村莊百姓何難向其詢問劉之協姚

之富下落或向拏獲賊匪跟究俱可得其實在蹤

跡卽專向該處設法圍擒方得要領若惟將零星

竄匪尾追跟剿轉任賊首乘間他竄又復到處糾

集於事有何裨益耶至探路鄉勇王上達王名達

同時陣亡深爲可憫著咨部照千總例議卹仍各

賞銀一百兩並查明伊二人之子於服闋後送部

帶領引見以示軫恤再前曾降旨令宜綿赴商州
鄭西一帶堵剿今湖北賊匪已不敢向西奔竄宜
綿竟不必再赴商州卽馳赴達州調度一切督率
進剿爲要

初八日巳福寧觀成惠齡奏言臣等前將碓窩

溪涼風臺等處賊卡奪踞賊匪震懾軍威復於
筆架坡等處添設賊卡加意嚴防自當乘其初

立之時速行奪占以遏賊鋒查城口子九洲等

處爲賊巢西南緊要之區道路叢岐防範尤宜

周密此時成德尙未繞至西南自應先令總兵

諸神保前往城口子一帶堵剿俟成德到時再

行相機布置文圖業已帶兵進至雙龍寺現擬

從薄道嶺黃金嶂一帶進攻臣等公同商酌城

口子地方中隔九洲賊卡必須先將該卡奪占

再令諸神保前往堵剿方免後顧之虞至文圖

一路兵力稍單應令成德先行協剿俟奪佔四

方臺後再赴西南一帶堵截一轉移間彼此均

有接濟是以臣等先令諸神保率領都司冶正

恩同知木特布等帶領兵勇先取九洲賊卡臣

觀成督率協領蘇勒芳阿遊擊呂朝龍知府趙

秉淵等直搶賊人新立響溪口賊卡並接應諸

神保一路復令慶溥率領遊擊董寧川守備孫

應奉千總宋古典等帶領兵勇先搶筆架坡新

立賊卡臣福寧督率候補道府依精阿雙慶遊

擊多福等帶領兵勇直取野人洞賊卡並接應

慶溥一路臣等一面知會文圖等相機進攻並

令關騰督率副將張持遊擊林朝輔等攻取對

語坪賊卡臣惠齡督率道員先福副將樊雄楚

許文謨等直攻楓箱樹賊卡並遙爲文圖聲援

於十一月二十七日丑刻同時並進

臣

觀成行

至半途忽見西南一帶火起探係候補都司蘇

榮煥縣丞符端帶領兵勇暗渡溪河潛至賊匪

屯糧之青竹坪地方乘其不備將糧石房屋焚

燒因兵勇無多已回本卡堵截

臣

觀成馳至響

溪口見新立賊卡一處約有數百人一齊抗拒

鎗石亂發隨分兵四面圍攻把總楊富貴陳裕
林首先拔開鹿角官兵一湧而入短刃相接殺
死數十人賊匪不能抗拒棄卡而逃又追殺三
十餘人生擒張添相等六名時諸神保已至九
洲將卡內草棚燒燃賊匪抵死抗拒把總苟文
德外委夏俊跳進賊卡兵勇一齊殺入武生張
忠蓋鄉勇頭目黃耀奎手戮執旂二賊復奪得

鐵礮一座餘賊紛紛四竄臣觀成帶兵趕至截

殺數十人餘皆奔上山頂隨將九洲賊卡佔踞

一面派兵守住一面令諸神保前赴城口子一

帶堵截臣福寧由碓窩溪河南一帶直撲野人

洞賊卡官兵人人奮勇一擁上前鎗擊箭射殺

死數十人賊匪料難抗拒卽向沿河一帶而逃

依精阿喜明帶領鄉勇隔河截殺臣福寧帶兵

追剿殺死及滾河淹斃者一百餘人把總蕭聯陞沈彪石開富王清等生擒賊匪段明等七名

餘賊盡向石板山賊卡逃竄隨鼓勵官兵趕至

石板山該處賊匪見官兵勇銳異常棄卡同逃

上山卽將該二卡分兵把守慶溥到筆架坡時

賊人齊起拒捕千總宋吉典把總孟光爵首先跳過濠溝推倒石卡而入官兵隨後擁進殺死

賊人無數餘皆奔竄該處地勢孤險不便紮營

隨將賊人草棚燒燬臣惠齡由涼風臺直取楓

箱樹賊卡又令先福等帶兵由苦桃嶺一帶援

應以分賊人之勢適至半山見楓箱樹賊卡壘

石高厚聚匪甚多當令千總胡報國用礮對准

轟摧打死二三十人並將卡墻擊塌一段臣惠

齡卽率領官兵飛行搶上將至溝邊賊匪拋擲

石塊施放鳥鎗並招颺白旗鳴鑼吹號招集附近各卡賊匪前來救援情形實屬可惡隨鼓勵

官兵奮勇殺入連砍一百餘人賊見官兵勇銳

紛紛四竄又被先福等截殺一陣盡向楓箱坪

梯兒巖一帶奔逃維時關騰等已將對語坪賊

卡擊破會合前來一同追殺賊匪跌巖墜澗者

不計其數並生擒李大榮等九人當臣惠齡奪

卡之時文圖帶兵由雙龍寺搶佔薄道嶺殺死
賊匪數十名立將該卡奪獲遂乘勝掩擊又將
火燒沖黃金嶂二卡搶佔正在安營之際詎賊
匪糾集千餘人齊來撲奪官兵分踞山梁鎗箭
並發殺死一百餘人始行退下是夜賊人分從
黃金嶂東西兩面山嶺蟻附而來文圖督率官
兵分路壓下殺賊甚多賊匪始退至西流溪把

守成德聞信亦帶兵接應前來護同知試用知

縣傅文炳帶領鄉勇隨同協剿亦屬出力計此

次四路進兵共割獲賊首一百零七顆奪獲鐵

礮刀矛糧石分賞鄉勇其陣亡受傷官兵查明

分別咨部再查副前鋒叅領塔思哈前隨臣惠

齡在灌灣腦打仗殺賊甚爲勇往經臣奏蒙

恩旨遇有本營應陞缺出卽行陞用旋在涼山軍營

染患時症當令回至荊州醫治茲據江陵縣稟
稱該員醫藥罔效於十一月二十二日病故合
併奏

聞

同日景安奏言連日探得賊匪自南而北肆行

焚掠逼近豫臣有鄧州南界將本省兵五百名

分在孟家樓都司衙魏家集二處嗣因恒瑞等

帶兵已到都司衙臣當將該處之兵撤至魏家

集臣親督紮營防守屢有竄入餘匪俱經隨時

截殺惟兵單力薄節經知會永保恒瑞慶成舒

亮等移師前來併力由北壓剿詎賊匪探知臣

處兵少於本月初一日辰刻由西路徑趨魏家

集分爲三股竟有六七千人之多搖旗吶喊直

撲營盤營中止有兵四百名若倉皇輕動一有

疎失恐賊匪乘勢北趨鄧州於事大有關係是

以^臣督率糧道完顏岱及文武員弁鎮靜堅守

鼓勵弁兵施放鎗礮擊斃十數名賊匪狡猾兇

悍退至鎗礮不及之地四面重重圍住^臣滿擬

永保恒瑞慶成舒亮等前來策應便可相機夾

擊乃自辰至酉盼望援兵不到賊又遣其黨與

數百人身背木板遮擋鎗箭由東西兩面前來

撲營意欲填壕竄入巨飭令將弁準備鎗礮俟

賊撲至營前一齊施放擊斃數十名賊始退回

不敢逼近賊見此營未動恐被掩襲不敢北趨

直至昏黑漸向東南退去恒瑞舒亮等星夜趲

行於初二日卯刻趕到魏家集賊已退至東南

十餘里外襄陽之喬家岡屯聚現在恒瑞等由

北面攔截永保慶成等本在南路追剿因聞知

賊匪業經北竄亦已星夜趕到新店舖看來有

此兩路大兵斷不再致北竄至軍火糧臺亦不

能不隨營轉移臣與畢沅約定督率兩省文武

不分畛域互相接濟總期無誤再健銳火器二

營兵丁前因起身匆促未及攜帶皮衣臣已製

備皮得勝馬褂一千八百件畢沅處亦辦二百

件陸續運送軍營分給以禦冬寒均奏入

上命軍機大臣傳諭福寧惠齡觀成景安曰此次福寧等統領官兵四路進攻將賊匪要卡獲佔多處痛殲賊衆所辦甚好現在一時屆沍寒福寧觀成惠齡着賞給御用元狐冠各一頂金盒各一個仍與慶溥諸神保關騰均賞給大小荷包候補道府依精阿都司蘇榮煥喜明千總胡報國宋古典把總孟光爵蕭聯陞沈彪石開富王清苟文德楊富貴

陳裕林外委夏俊武生張忠蓋俱著加等陞用鄉
勇頭目黃耀奎著賞給七品頂戴以示獎勵陣亡
受傷官兵著咨部優卹副前鋒叅領塔思哈屢次
打仗出力茲因病身故殊爲可惜著咨部照前鋒
叅領在軍營病故例議卹至景安在魏家集紮營
帶兵無多被賊圍裏永保相距不遠一聞賊匪北
竄卽當迅派大員酌帶官兵一二千名速往應援

乃景安於初一日被圍恒瑞舒亮初二日始行趕
到而承保慶成尚未到彼景安能督率將弁奮力
堅守是以一晝夜之久並無疎虞設因衆寡不敵
有意外之事成何體統且鄧州迤北一帶地勢平
衍若無景安帶兵攔截任令北竄豈不更覺費手
承保之罪百喙難辭而恒瑞慶成舒亮俱係特派
前往大員何以隨同貽誤著惠齡會同景安密查

永保恒瑞慶成舒亮四人內因循玩悞之處孰多孰少分別具奏俟朕核其輕重量加懲處至景安帶兵僅四百名被六千賊衆層層圍裹幸而景安持以鎮定不使賊匪知官兵虛實用能堅守遏賊甚屬可嘉景安着賞御用元狐冠一頂金盒一個大小荷包以示優獎出力防守官員並著景安查明具奏候朕加恩兵丁四百名着賞兩月錢糧

並著傳知該兵丁等以伊等猝遇多賊能聽巡撫
號令一心固守使賊不敢進逼營盤是以特恩加
倍優賞俾伊等感激懼忭更加鼓勵惟景安在豫
楚邊界駐劄帶兵過少著酌量情形或於本省及
附近地方酌調千餘名以資堵剿彈壓之用仍著
一函具奏

上諭內閣曰現在四川達州並所屬之新寧太平東

鄉地方教匪滋事闖入陝境業經官兵痛加剿洗

不日自可撲滅淨盡第念各該處被賊滋擾召募

鄉勇堵禦並運送軍糧不無耕作失時殊堪軫念

現在已屆歲杪本年應征錢糧自己全完所有四

川達州新寧太平東鄉並陝西漢中府所屬之西

鄉及興安府所屬之安康平利紫陽等州縣明年

應征地丁錢糧俱着交該督撫查明普行豁免以

示朕惠愛良民格外恩施至意

初十日辛巳景安奏言查襄陽之呂堰迤西一帶

現當賊匪往返奔逸百姓紛紛遷至鄧州新野

境內暫避當此隆冬失業實堪憐憫臣已經分

派專員妥爲安插其乏食貧民亦俱量加撫卹

至鄧州新野邊境百姓見大兵已抄至北面臣

復曉諭撫綏俱各寧謐不致驚慌遷避再南陽

所屬等縣與楚陝毗連在在均關緊要且鄧州
浙川向有邪教傳染此番大加懲創難保無餘
孽潛藏必須重兵彈壓現在除三尖山新店舖
兩處防守之一千名山西兵外僅有兵五百名
實屬不敷防堵本省已無兵可調鄉勇雖多又
不足恃永保處現有一萬數千大兵臣原擬奏
請將豫省之二千征兵調回邊境堵截但目下

正當兜剿喫緊之際難以分力俟永保等剿辦
大局定後仰懇

皇上天恩勅下永保將豫省征兵二千名令南陽鎮
總兵王文雄帶領回至邊境協同分駐彈壓實
於豫襄一帶均有裨益奏入

上命軍機大臣傳諭永保曰此時鄧州新野一帶防
堵最應嚴密永保等一路官兵現有一萬五六千

名足敷圍剿著傳諭永保等卽將豫省征兵二千
名交王文雄卽刻帶回分駐鄧州新野唐縣等處
以資堵截並爲北面迎擊之用

十一日壬午宜綿奏言查洞汝二河之賊在漢江

南岸大小米溪蒿坪河之賊在漢江北岸相距
數十里至十數里不等而紫陽縣城亦在北岸
與米溪一帶較近必須先將江北之賊亟爲剿

除然後可攻洞汝一河之賊始無後患隨飭索
費英阿卽由米溪一路進兵茲據該鎮稟稱大
米溪之賊因官兵剿捕又將小米溪蒿坪河兩
處之賊竄合一處約共二三千人該鎮於十八
日馳抵該處察看情形深溝高壩道路崎嶇南
北俱係稻田田內蓄水深至沒膝賊人佔據溝
口重重設卡分佈於叢山密箐間以爲巢穴該

鎮傳訊土人晒明路徑率同遊擊哈三泰蕭福

祿帶兵五百名從大堰溝山頂前進遊擊王相

龍守備朱天貴景坤帶兵四百名從小米溪溝

前進十九日寅刻兩路官兵逼近賊巢施放鎗

礮賊匪分股抵禦自辰至未官兵奮勇齊進殺

死賊匪一百餘人乘勢直撲賊寨並將田水決

放因泥濘尙深難以速進兵丁間有受傷時已

昏暮紮營少息二十暨二十一兩日該鎮督率
弁兵日夜攻擊又殺賊三百餘人生擒正法一

百餘人賊勢漸覺窮蹙二十二日王相龍帶兵

鼓勇攻撲賊人自知必死遂將寨內老弱婦女

自行放火燒斃該鎮等冒火撲剿殺斃甚衆生

擒正法四百餘人逸匪竄至大米溪口之臯山

頂上潛匿拒守該鎮飛稟催兵圍剿

臣

查臯山

前臨漢江西至紫陽縣城二十餘里東至洞河
口十里急宜分兵防堵當卽派兵一百五十名

前赴縣城防守並派遊擊蕭福祿帶兵一百五
十名幫同遊擊曹文通堵截洞河口以防賊駁

救援之路嗣據該鎮稟稱二十三日夜密令弁
兵潛越山坡添設卡倫分斷賊之汲道二十四
日該鎮督率都司白印斗及秦承恩派往之知

縣龍萬育王家齊等分帶兵勇前後夾攻賊人
憑高據險抵死抗拒我兵施放鎗礮卽潛伏石
崖躲避及官兵撲上將近山頂又卽拋石擊打
相持半日賊人因汲道斷絕漸形慌亂二十五
日黎明忽聞漢江南岸鎗礮之聲探係洞河賊
匪約二千餘人奔至江岸前來救應始則施放
鐵礮繼則砍木紮筏欲渡維時遊擊曹文通先

於沿河密排鎗礮一見賊匪搶渡卽隔岸施放
賊匪倚恃人多毫無退意雖經鎗斃多人猶敢
望煙直進迨連放大礮擊斃數十人後始稍退

却延至申刻蕭福祿帶兵從小米溪山梁趕到
該匪見官兵接踵而至卽將沿河房屋焚燒乘
煙焰迷漫之際退入洞河曹文通蕭福祿等亦
卽各帶兵丁將大米溪圍住二十六日賊人外

無應援內絕水道糧食已盡卽在山頂喊叫情願投順該鎮以賊勢萬分窮蹙遂傳令拋棄兵

刃下山就縛計共七百五十六名口並將前後

所獲賊首翁祿玉林開泰押解前來臣逐加嚴

訊該二犯係首先倡亂大逆不道取供後卽凌

遲梟示其投出賊犯訊係放鎗擲石抗拒官兵之人一概處斬被脅良民責令鄉保認明釋回

安業奪獲鎗礮刀子存貯備用搜獲牲畜分賞

鄉勇所有出力文武員弁及受傷陣亡兵丁鄉

勇查明咨部卹賞

臣

於拜摺後卽同提臣柯藩

帶兵前赴洞汝二河會合索費英阿之兵進剿

再大小米溪之賊與洞汝二河相隔一江當索

費英阿未到之先兩路賊匪亟思竄合經秦承

恩派令遊擊曹文通都司白印斗帶兵三百名

在於大米溪山口據險堵截斷賊要路並派知
縣龍萬育王家齊等雇募鄉勇協同防禦該遊
擊等在漢江南北兩岸打仗五次殺賊多人固
守二十餘日未令賊匪聯爲一氣是以索費英
阿帶領甘州官兵一到米溪卽四路兜圍迅速
殲滅實得該遊擊等防堵嚴密之力至
臣前調
西安駐防滿兵一千名前來興安協同剿賊茲

副都統豐伸布於十一月二十五日帶兵馳抵

興安該處與川省連界時虞川匪竄入民情不

無疑懼且此時軍火糧餉皆由郡城運送不可

無重兵彈壓臣已飭知豐伸布將所帶滿兵暫

駐興安以安民心兼爲後路策應再由葉爾羌

更換回京之辦事大臣明興前經奏赴商州防

堵楚豫逸匪因該處安靜無事於十一月二十

七日馳抵興安臣查明興曾任封圻且總辦南

路叅贊事務有年雖未身歷戰陣於軍務一切

頗能留心現在洞汝二河賊勢猖獗必須分兵

進剿事竣後臣仍須赴川會剿太平東鄉賊匪

正在需人之際臣卽擬留明與同赴紫陽與柯

藩協力剿辦

同日英善勒禮善佛住奏言查達州東鄉太平

三州縣幅幘遼濶幾及二千里本年九月間達

州邪匪在亭子舖焚掠起事東鄉太平兩縣邪

黨聞風響應週圍一百數十里均爲匪等盤踞

經_臣等連次痛剿刻下該匪等竄至東鄉之茅

坪張家觀一帶恃險抗拒十一月二十七八等

日黎明乘大霧迷漫率衆直衝營卡意欲竄逃

均經_臣等督率兵勇截殺斃賊五六十人及四

五十人不等賊復退回原巢現仍嚴密堵禦相

機剿殺至東鄉縣屬豐城屯聚賊匪距縣城一

百餘里臣英善派委遊擊愛隆阿署遊擊羅定

國帶領兵勇分路防堵該匪等連次撲卡俱經

兵勇擊回其太平縣屬賊匪蜂起計有十處相

距臣等劄營地方均有六七百里之遙除青石

溪小壩山鴿子山黃泥灣古家坪五處賊匪業

經臣英善飭令道員李鉉督率該處文武員弁

鼓勵兵勇剿除淨盡茲又續據都司謝開先會

同署主簿蔣日紀等率同紳士兵役鄉勇於二

十一日寅刻分作五路進剿攻克鞍子坪賊巢

殺賊數百名二十二日又追殺賊匪二百餘名

二十三日搜山殺賊四十餘名首逆黃富才卿

有義因我兵追緊跳巖身死經鄉勇指認確鑿

梟首示衆所有鞍子坪屯聚賊匪業經剿盡其出力弁兵紳士鄉勇及陣亡受傷者查明另報

又據道員李鋹稟稱陝省官兵三百餘名僅敷防守太平縣城池該道督同委員知縣崔特峯署太平縣知縣鍾蟠雲等設法雇募鄉勇數千名率領分投堵剿往遷壩獅子山陳家壩通天觀賊匪每處殺賊數十名及百餘名不等並陸

續生擒賊匪二十一名訊明後俱卽一一梟示

餘匪竄併南井關高家寨通天觀分起屯踞臣

英善當卽飛飭謝開先等卽帶剿除鞍子坪出

力紳士鄉勇馳赴高家寨一帶會同道員李鋈

等設法攻剿臣等惟有竭盡心力一面飛催續

調駐防兵丁一面添募鄉勇遇有可乘之機卽

將茅坪張家觀一帶賊匪趕緊兜擒以次剿洗

萬不敢觀望遷延

同日永保恒瑞慶成舒亮奏言查十一月十六
日晚間逆匪自黃龍塢折向西北竄逸其意以
曾經蹂躪之地無可掠取欲圖窺伺豫境若前
路無兵攔截聽其竄入滋擾大有關係是以

臣

等於十七八等日帶領馬兵自黃龍塢晝夜間

道疾行抄繞賊前以遏去路

臣

永保等馳抵呂

輟驛地方賊匪適至當經攔截剿殺賊始西竄

因楚省光化一帶之老河口臣等先派總兵德

齡帶兵一千餘名赴彼兜截臣永保恒瑞慶成

舒亮等卽分兵南北兩路迎賊頭尾至蠻張家

集地方分投並進痛加剿殺詎賊匪又復折向

北竄臣恒瑞舒亮就近帶兵由西北兼程抄截

至魏家集臣永保慶成卽自南路繞赴東北一

帶兜截而賊匪竄至魏家集見有景安在彼帶

兵堵禦又知兩路官兵向前抄截夾擊急轉向

東北距新店舖漸近不意臣永保慶成亦抄繞

至彼該逆匪不敢停留卽由原路向南竄回襄

陽所屬太山廟一帶地方臣等當卽一面飛咨

畢沅將南面沿江要隘嚴密堵防搜拏竄匪現

在臣永保慶成自東北面臣恒瑞舒亮自西北

面向南相機兜擊不使復有他竄務期設法生擒逆首早淨根株至節次拏獲活賊訊問劉之協姚之富等下落皆稱賊夥內並無劉之協其人惟姚之富現在賊中並屢差熟識逆首之人密爲偵探均與賊供無異臣等仍加意留心斷不使其竄逸漏網均奏入

上命軍機大臣傳諭宜綿英善曰宜綿奏剿洗米溪

賊匪淨盡情形覽奏欣悅米溪逼近紫陽縣城賊
匪等負嵎抗拒經宜綿督飭索費英阿分路進剿
斷其汲道並將南岸救援之賊用礮擊退圍剿大
米溪賊巢殲除淨盡秦承恩於索費英阿未到之
先豫經派委文武各員防堵俾漢江南北賊匪不
能聯爲一氣得以速就殲滅所辦俱好宜綿秦承
恩索費英阿均着賞給大小荷包其帶兵出力文

武員弁首先出力之遊擊曹文通著卽以叅將用
餘俱着咨部議敘所有此次跟隨索費英阿打仗
兵丁俱著賞給一月錢糧其陣亡受傷兵勇並著
查明咨部卹賞現在洞汝二河賊匪亟應乘官兵
勝勢上緊攻剿又據英善等奏到情形太平縣屬
青石溪等五處及鞍子坪屯聚賊匪均經剿淨其
東鄉之茅坪張家觀一帶現已督率官兵趕緊兜

擒看來英善等所辦尚能鎮定稍紓懸念所有此
次帶領兵勇攻克鞍子坪賊巢之都司謝開先著
咨部議敘又據宜綿奏酌留滿兵暫駐興安所辦
亦好該處爲川陝要衝自應撥兵駐守以資彈壓
並着察看情形如剿辦川省教匪或須增添兵力
卽可就近調往俟事竣回甘卽將此項滿兵順便
帶回

上又命軍機大臣傳諭惠齡永保景安曰永保等奏

剿辦賊匪情形仍屬無謂前此賊匪偷渡滾河永

保等未能督兵迎擊及將賊匪追至蕭家岡後又

未能設法攔截以致賊匪又復竄回襄陽所屬之

太山廟一帶地方而永保等仍不過分兵追剿專

事尾追寧不自知愧勵乎至滾河潘家臺東津灣

一帶係賊匪偷渡要路永保等從前既知該處緊

要卽永保未能親身前往亦應於帶兵大員內酌
分一二人到彼防堵方爲得力至慶成年力富強
尤當奮勉自効知滾河一帶緊要亦應自請前往
駐防庶呼應較靈防守可期嚴密何以並不前赴
要隘僅派微末之都司在彼堵禦以致賊匪得以
乘間逃竄而恒瑞舒亮等亦復隨同貽悞其罪均
無可諉如惠齡到時永保仍未能葢事著卽傳旨

將永保革職交部治罪其恒瑞慶成巴克坦布阿

爾薩朗訥音碩雲保姑令戴罪立功暫緩究辦俟

平定後統計功罪再降諭旨

欽定剿平三省邪匪方略正編卷二十四

丙辰年

十二月十四日

乙酉

福寧觀成惠齡奏言十二月

初四日接准英善知會達州賊匪屯聚橫山子

茅坪等處現在兵單賊衆屬

臣

觀成帶兵速往

臣

等前以達州逆匪經英善等督辦且有陝省

官兵前來協剿似可卽時撲滅

臣

觀成正在分

路帶兵難以舍此而去今達州賊匪膽敢肆行

不法戕害官兵臣觀成未敢拘泥前奏稍有遲

疑自當卽行馳往惟黃柏山地勢寬廣賊匪衆

多以臣等現帶官兵七千餘名僅能擇要堵擒

臣觀成不敢多帶官兵前往以致顧彼失此今

酌帶五百名卽於初五日起程赴川但達州兵

少賊多必須稍添兵力臣等再四籌商除一面

飛咨宜綿秦承恩於陝甘就近各標營內酌派

官兵二千名迅卽覓路速赴達州會剿臣觀成

自長陽巴東巫山一帶至川山路崎嶇程途遙

遠計抵達州之時陝省官兵亦可陸續到齊若

宜綿等已將興安一帶賊匪剿淨帶兵前往則

臣等所調該省之兵卽可停止以節糜費臣福

寧惠齡惟有帶領現在官兵相度機宜速將黃

柏山賊匪掃蕩以期上慰

慈懷奏入

上命軍機大臣傳諭惠齡福寧宜綿勒保曰此事前據英善等奏到早經有旨令宜綿勒保前往督率分投剿捕並令宜綿如帶往兵丁不敷派撥卽於陝甘二省就近酌調今觀成因係成都將軍本省地方匪徒滋擾星回剿辦所見亦是但前因湖北光化一帶賊屢竄逸已令惠齡速往替永保總統

軍務想伊等拜發此摺時尚未接奉前旨至黃柏山之賊閱所奏情形搜捕亦恐須時日惠齡觀成俱離該處帶兵大員雖有成德文圖諸神保慶溥在彼而調度祇有福寧一人計勒保接奉赴川諭旨卽已啟程亦未出楚境著不必前往四川於何處接奉此旨卽於該處取道迅赴黃柏山幫同福寧督辦現在該處官兵經觀成帶領五百名回川

倘兵力不敷卽著勒保酌帶貴州得勝之兵前往
協剿自更得力

十五日丙戌永保恒瑞慶成舒亮奏言查賊匪自

蠻張家集剿敗後亟思北竄復被官兵兩路攔
截未能窺伺豫境仍轉回襄陽地方賊衆恐盤

踞一處掠食爲艱又恐官兵圍剿計極狡獪遂

潛分兩股一向南面之李食店一向西北之上

薛家集吳家集一帶分屯臣等以北面可通豫

境關係緊要南面有大江阻隔且係曾被蹂躪

之地居民尙未歸業自應一面作爲向南進取

之勢一面分布官兵出其不意先將西北面上

薛家集吳家集屯聚賊匪剷除卽有剷散餘匪

勢必歸於南竄賊夥官兵卽可併力剷辦臣恒

瑞舒亮帶領原在北路之官兵仍由北向南下

壓臣永保慶成帶領原在南路兜截之官兵一

面作爲攻剿南面賊匪之勢一面分兵由東而

西夾擊臣等彼此約定臣恒瑞碩雲保總兵富

成督率翼長七十五協領拉明阿副將丁有成

皂靈保等於初七日黎明帶領馬步弁兵由北

進攻吳家集屯聚之賊臣舒亮阿爾薩朗總兵

明泰督率翼長德興副將穆維李紹祖等帶領

馬步弁兵分攻上薛家集屯聚賊匪臣永保慶

成帶領副都統訥音六十七及巴圖魯侍衛哲

克祥金保等由東而西設伏夾擊留都統巴克

坦布總兵德光王文雄帶兵作爲進攻李食店

賊匪之勢使之牽制彼此不能接應吳家集上

薛家集屯聚之賊不意官兵兩路驟至一時不

及避竄頗形慌亂拚死抵抗官兵鎗礮齊施而

賊匪竟有數十人直奔入官兵隊內經官兵等

刀矛並舉將兇悍直前之賊悉行殲斃賊仍敢

接續前來臣恒瑞舒亮碩雲保卽帶巴圖魯侍

衛丑保伊里布等並各營馬步兵乘勝橫出衝

截賊始却退臣永保慶成訥音六十七及巴圖

魯侍衛等帶領馬兵亦由岔路衝出賊匪紛紛

敗走臣等各帶馬兵追殺二十餘里統計殲斃

賊匪一千餘人內有小頭目三名燒燬賊屯七

處溝坎水塘跌傷淹斃死者亦復不少餘匪竄

併李食店縣內其時風雪交加官兵競進因天

色向暮暫行劄住官兵亦有陣亡受傷者查明

造冊咨部臣等現在商酌官兵仍分兩路相機

分布兜截總使賊匪不能復向西北奔竄一面

隨處截剿賊匪縱設法竄避祇有東南可走漸

仍逼至黃龍壩一帶則襄郡以北楚豫交界俱

就肅清並設法截其逃竄之路可期速擒首逆

同日惠齡奏言查觀成昨因達州賊勢猖獗酌

帶官兵馳往督辦福寧自移兵至此一切賊巢

形勢均已詳悉且布置調遣實屬細心周到深

堪倚任並有成德文圖諸神保慶溥關騰分路

帶兵力阨賊要俱可互相策應昨

臣

與福寧

又遣派官兵繞赴黃金嶂協同成德文圖務令
先將四方臺搶占以便各路分逼賊巢爲四面
兜擒之計現在雨雪甚大山路陡滑一俟天色
晴霽即可奮力進攻就目下情形而論臣自可

無須在此協剿查襄陽一帶地勢平衍道路紛
雜賊雖肆行奔避究係驚竄餘生如能使其聚
集一處自易一鼓殲擒惟聞興安達州等處均

有賊匪滋擾倘若任其西竄聯爲一氣未免搜

捕較難臣現已飛咨永保畢沅務將向西一路

要隘速撥重兵嚴行截擊以免逃逸現將此處

剿辦各事宜與福寧通盤籌畫酌定機宜併將

臣所帶各兵均交福寧統領臣酌帶襄鄖兵二

百名及熟悉彼處地方情形文武員弁於初八

日起身倍道前進馳赴襄陽恭傳

諭旨將永保解任令其進京臣卽察看情形妥爲布

置務將賊匪速爲剿滅以冀仰慰

慈懷均奏入

上命軍機大臣傳諭惠齡永保恒瑞曰永保等奏賊
匪在上薛家集吳家集一帶屯聚經官兵分路夾
擊追殺二十餘里殲賊一千餘名現在相機布置
將賊匪仍逼至黃龍壩一帶設法擒拏首逆等語

看來永保等尙有悔過發憤之意但不能追殺賊

匪又未能四面兜圍擒獲首逆且賊匪現在屯聚

處所皆可奮力剿殺乃欲仍逼至黃龍壩地方再

行截剿豈除黃龍壩而外卽不能殲戮賊衆耶是

永保等辦理仍未能得有把握此時惠齡已馳抵

襄陽應大加振作鼓勵將士並設法布置將賊匪

兜圍截擊速奏捷音

十七日

戊子

景安奏言查湖北賊匪紛竄恒瑞舒

亮等帶兵由北面壓剿永保慶成等帶兵在東

路攔截茲據差弁探報賊匪於初十日由王家

河等處分股渡河向東南奔竄

臣

思賊匪逞其

狡獪竄徙靡寧大兵跟蹤追剿恐生力勁旅又

復不戰自疲今賊匪既竄向東南倘復折而北

則豫省唐縣新野邊境之倉臺水臺等處又關

緊要而西路三尖山一帶離城已遠臣遂將西

路弁兵調赴東路倉臺水臺設立營卡嚴密堵

截臣親帶兵一二百名往來督察並諭令鄉勇

各守各村凡遇面生可疑之人嚴加盤詰如有

竄匪隨時擒殺再臣聞逆首除姚之富外尚有

劉起榮等數名諒永保等分投兜剿若擒獲姚

之富則劉起榮等自亦易擒矣奏入

上命軍機大臣傳諭惠齡勒保汪新景安曰景安奏
賊匪由王家河等處分股渡河向東南奔竄等語
永保一路統領大兵萬數千名之多不能妥爲布
置設法兜圍惟知在後尾追以致賊匪乘間東奔
西竄生力精兵恐致又形疲乏此皆永保調度失
宜之罪此時惠齡自己馳抵該處應遵節降諭旨
一面將永保革職解京一面會同景安查明恒瑞

等如何貽悞之處據實叅奏不可稍有姑息至惠

齡到彼接辦軍務應大加整頓通盤籌畫於扼要

處所設法兜剿俾賊匪無從逃竄務將首逆姚之

富劉起榮張富國等按名拏獲究明劉之協下落

務淨根株至襄樊一帶防堵事宜著汪新前赴該

處妥協經理勒保前已有旨令其前赴黃柏山剿

賊現在湖南苗匪已經剿竣勒保當遵旨速赴黃

柏山會同福寧等將該 廵屯聚賊匪悉數殲除再
百祥現已補授重慶鎮總兵並着惠齡酌量情形
如湖北需伊在彼帶兵卽留於該處倘無需該鎮
在彼卽令由驛馳赴達州幫同剿賊以資得力

十九日 庚寅 宜綿奏言 臣 於本月初八日接奉

諭旨令 臣 於剿淨興安賊匪後迅赴商州鄖西一帶

堵剿因 臣 正在紫陽縣之洞河口剿辦未竣不

能兼顧隨移會副都統豐伸布迅卽帶領駐紮
興安之滿兵五百名由水程前赴鄖陽再赴商
南復令明興帶固原兵五百名一併前往以資
堵禦茲於初九日戌刻又奉

諭旨飭

臣

速往商州鄖西

臣

卽應欽遵前往惟

臣

在

洞河口察看形勢偵探路徑賊之巢穴在相距
七十里地名五作雲進口皆懸崖峭壁夾岸小

徑下臨深溪是爲賊寨中路賊寨之東三十里名
大道河西五里名汝河俱有路可通五作雲之南
有斑鳩關雷打石兩處皆通川省爲賊匪竄逸必
由之路以上各處賊匪均於要路刨挖陷坑密布
竹簽阻塞官兵路徑臣飛飭多製土囊以備填
塹而進現在柯藩索費英阿分兵由大道河汝
河前進皆繞出賊營五作雲之後白山梁壓下

較之中路仰攻更爲得力且使賊衆不能向後

路之斑鳩關雷打石兩處奔竄臣督率員弁帶

領兵勇由中路進攻迎截賊匪前路秦承恩親

赴漢江岸口督運軍火糧石現經柯藩在迴水

灣索費英阿在牛頭寨等處奮力攻打各奪獲

賊卡一座惟因連日雨雪山高路滑兵丁實難

行走暫候晴霽卽密行會進此時正當喫緊之

際若遽移兵他往不惟賊匪前路無人攔截易
致奔逃且使百姓亦生驚疑臣再四思維實有
不可驟離之勢惟有仰仗

天威上緊籌辦數日內一舉集事彼時臣當兼程前

赴商鄭一帶遇有賊匪正可迎頭截殺再興安

所屬除平利縣賊匪久經剿淨安康縣之安嶺

高廟嶺將軍山青山溝壩駝家壩松樹壩越海

溝紫陽縣之蒿坪河大小米溪等處賊匪俱經

剿淨惟聞安康縣與太平連界之光頭山地方

距郡城三百餘里有川省匪徒竄入滋擾業經

飭委遊擊鍾岳等帶兵四百名前赴該處堵禦

一面移知柯藩俟洞河事竣卽赴光頭山會同

秦承恩將賊匪辦淨再行馳赴商鄖協剿現在

興郡漸就肅清民情頗爲安貼又臣前因索費

英阿調赴興安隨派署副將瑪靈阿帶漢中協

兵三百名赴太平防守又派署副將皂常保帶

洮岷協兵五百名繼進協同堵剿再洞汝二河

被賊焚掠難民陸續逃出現俱扶攜老弱依傍

軍營搭葢草棚居住臣卽飭隨營之漢興道文

需挨戶查點共四百零戶大小二千六百一十

二口敬宣其

恩旨先行撫卹其逃往他處及附近安嶺將軍山蒿

坪河大小米溪等處居民被賊焚掠者臣俱隨

時飭令地方官確實查明妥爲安撫彙送秦承

恩照例核辦奏入

上命軍機大臣傳諭宜綿秦承恩曰前因黃龍塢賊

匪乘間西竄是以降旨令宜綿馳赴商州鄖西一

帶堵剿旋據永保等奏賊匪經官兵截剿後又復

南竄不能再向西北奔逃而川省達州邪匪尙在

滋擾復諭令宜綿速赴川省會辦毋庸前赴商鄖

本日宜綿覆奏之摺尙未接到續降諭旨據稱洞

河賊匪巢穴情形現經分兵繞出賊後上緊剿辦

一切俱合機宜但現在川省太平東鄉等處屯聚

賊匪亟須搜捕宜綿此時既有不可驟離之勢惟

當將洞河賊匪迅速剿竣速赴川省偕英善等會

合夾擊爲要

二十日

辛卯

畢沅奏言黃龍塢賊匪前此原欲西

向光化縣老河口一帶奔竄因永保等先已派

令德齡等在彼堵截並厚集鄉勇協同迎剿斃

賊一百餘名賊匪不能越過轉而向北援及豫

省邊界魏家集地方亦被擊退恒瑞舒亮等隨

卽追至賊復遁赴吳家集一帶於初七日經恒

瑞阿爾薩朗舒亮碩雲保等統兵追擊初猶捨

死抗拒適永保慶成等趕至兩路夾攻賊匪抵

敵不住俱向東竄永保等因北界豫省地勢平

坦一被竄入則更難兜圍而西連川陝路徑紛

岐恐被蔓延勾結是以遏其西北二路逼向東

南而南有襄江險阻僅東面一路自易得手惟

內河水淺灘多處處可涉賊於初十日已至宋

家埠口對河東面吳家坑一帶屯聚臣恐其直

撲襄樊所關非細隨抽撥樊城官路口營卡兵

勇派令游擊什圖貢永吉都司陳德文等帶領

卽在宋家埠拏卡連用鎗礮轟擊臣一面親率

徐昭德高杞胡齊崙舒山等鼓勵兵勇在官路

口嚴謹巡防持以鎮靜民心甚安第賊蹤詭譎

異常卽由東津灣王家河分竄黃龍壩一帶永

保恒瑞已與舒亮慶成碩雲保富成等分頭窮
追晝夜不停沿途殺獲甚多從前被裹之人陸

續投出賊勢已形窮蹙察探情形似易迅就掃
除再樊城在襄郡對江北岸上通陝豫下達武
漢水路通衢百物殷繁商賈雲集爲漢南一大

都會本年猝被賊擾因本無城垣可恃民房舖

戶多被蹂躪自

臣

駐守以來商民紛紛復業俱

經仰體

皇仁妥爲撫卹其殷實商民多有購備磚瓦木料急

思復業奈餘匪尙未殲除心存觀望至貧民爲

數尙多現在時屆嚴冬急應使之各有所事庶

得一律生全臣因籌計善後事宜察看該處形

勢必須建築磚城一座方可捍衛無虞但與其

俟撤兵之後始行辦理不若乘此難民空閑需

食正殷之際就地招徠以工代賑既有以衛護

兵民又可使窮黎謀食兵洵爲一舉兩得臣考之

史乘樊城起於晉代迭經廢興迨前明傾圮以

後遂未修築迄今舊址猶存不難循照興修體

訪輿情亦甚踴躍所有向南臨江一面居民房

屋原已被焚其屋基皆願讓出一併修築臣率

襄陽道胡齊崙等率領匠工踏勘丈量周圍城

六里有零估計約需銀十餘萬兩如蒙

俞允卽當擇日興工所需工料等項銀兩應請先於
軍需項下暫行借動俟將來查變逆產價銀自
可歸欸亦無須另籌經費

同日景安奏言竊臣欽奉

諭旨令將在魏家集帶兵堅守之出力官員查明具

奏等因臣當將兵丁傳齊宣示

恩旨普賞兩月錢糧並面加曉諭該兵丁等俱各歡
欣鼓舞至是日在軍營出力防守之文武員弁
謹查明分別等第開單呈

覽再佐領清書都司曹星千總連得元隨臣晝夜防守

奮勇擊賊把總張霞舉昏夜冒火迎探大兵均

屬出衆奮勉再臣於本月十四日欽奉

諭旨令將豫省征兵二千名交王文雄卽刻帶回分

駐鄧州新野唐縣等處以資堵截仰見

皇上睿謨周密臣當卽飛咨永保飭知王文雄速行

遵照外此時賊匪又竄向東南之東津灣黃龍

壩一帶恐其復折而北向則豫省東路較爲喫

重臣先將現有之兵撥赴倉臺水臺等處分設

營卡嚴密防堵俟王文雄帶領官兵到日再與

酌量緊要處所分撥駐守又前據王文雄告知

河南官兵二千名自出征以來除陸續陣亡傷

故三百六十三名外現在隨營之兵止有九百

三十六名其餘七百一名均經畢沅零星分撥

各處防禦臣竊思兵非成隊不足以壯聲威且

以河南之兵零星散布湖北地方於防守亦屬

有名無實自應更換調回臣現已飛咨畢沅查

明河南官兵現撥何處防守速行更換遣回以

資歸營捍衛均奏入

上命軍機大臣傳諭畢沅惠齡景安曰永保等一路
兵多將廣不能將賊匪痛加圍剿惟事尾追現據
畢沅奏賊匪竄至吳家坑黃龍壩一帶屯聚若永
保等能於惠齡未到之前生擒首逆剿淨餘黨尙
可將功折罪若再遷延時日俟惠齡到後始能竣
事不特永保身爲總統罪無可辭而恒瑞慶成舒

堯等隨同貽悞均有應得之咎不可不自知愧奮
以期稍贖罪愆至畢沅奏樊城地居扼要修復城
垣舊制藉資保障正當如此但須爲之以實俾帑
不虛糜而貧民得藉工作以資餬口不可任令經
手官役從中侵冒畢沅現赴湖南前已有旨令汪
新移駐襄陽督辦一切該撫於地方情形雖能熟
悉但究係書生恐於經理善後諸事未能得有把

握惠齡原係湖北巡撫且現在襄樊一帶督兵相距不遠並傳諭惠齡遇有該省地方要件仍當與汪新共同商酌妥協辦理不可因業經離任於軍務外不復兼顧至景安奏調回河南征兵以資堵截一節自應如此辦理王文雄帶兵回豫務於湖北交界緊要處所分撥駐守截拏逸匪毋使一名

闖入

上諭內閣曰景安奏湖北賊匪擾至河南魏家集地方時經官兵奮勇擊退所有出衆奮勉之佐領清書都司曹星着賞戴花翎千總連得元把總張霞舉着賞戴藍翎另單所奏之出力文武員弁均着交部按其等第分別議敘以示獎勵

二十一日 壬辰 景安奏言本月十六日據差弁張

霄舉等探稟十五日永保恒瑞慶成舒亮等在

集三才圖會卷二十四
三板橋地方打仗賊目劉起榮所領賊數無多
不能抗拒向東南逃竄永保等現在帶領馬隊
沿途追殺聞得逆首姚之富所領一股賊數較
衆先已竄往豐樂河官莊一帶等語又接據南
陽鎮總兵王文雄來信該鎮現在留守營盤俟
永保等打仗收兵後卽遵

旨帶領河南隨營官兵回守豫境其畢沉處分撥防

守各處之河南兵七百名約計旬日內俱可趕

到臣恐剿敗賊匪四散逃竄仍將現有之兵分

設營卡督率嚴防並查新野唐縣有唐白二河

南通襄江恐賊匪情極或由水路潛自遁回亦

須密爲防範臣嚴飭員弁晝夜巡查盤詰斷不

使有漏網奏入

上嘉之

二十一日癸巳永保恒瑞慶成舒亮奏言查賊匪

前分兩股一在近豫境之吳家集一在近光化

之馬家集意在牽掣官兵臣等偵知賊情先將

吳家集屯聚之賊剿辦馬家集之賊急圖他竄

臣等仍分兵兜截賊勢忽西忽北臣等隨勢截

剿晝夜追趕不使休息賊匪計無所施順其熟

識路徑俱向黃龍壩一帶逃奔臣等於滾河一

帶共派兵四千名令總兵德齡明泰駐紮王家

河潘家臺等處分段堵禦

臣

舒亮在張家集駐

兵防堵仍不時稽查王家河一帶以防賊匪復

向北竄查黃龍壩一路係久經焚掠之處且大

半俱係習教匪徒當賊匪起事之初恐其夥黨

回心將房屋悉行燒燬已無儲畜賊衆無從攫

食斷難久住今被官兵兇截追剿無法奔竄地

方散漫固不能四面密圍而賊情狡獪亦斷不

肯自投絕地臣等連日兜截衝擊除沿途殲戮

外其被脅投出之人及逃匿搜獲者已不下一

二千人現在尚有紛紛投首者臣等詳加訊問

賊夥內悔怨者十居八九當用好言安撫並知

會畢沉速委賢員妥爲安頓臣等現今步兵量

力前進馬兵趁勢向前趕彙相機剿辦如賊匪

屯在一處卽併力圍攻如分股逃竄卽分路兜
剿總不使其遠遁並不令其休息以次殲除似
不易得手奏入

上命軍機大臣傳諭惠齡曰永保等奏到剿賊情形
仍係跟蹤追捕殊屬無謂永保等統領多兵若能
設法布置上緊兜截賊匪早應剿淨乃祇知在後
尾追以致賊匪東奔西竄官兵不戰而疲玩悞之

罪更何置喙且現在賊匪向黃龍壩一帶逃竄永

保等令步兵量力前進尙未追及所言尤不足信

賊匪多係步行豈有官兵不能追及之理卽間有

馬匹現在健銳火器二營騎兵及西安馬兵爲數

不少前據景安奏各省協濟馬二千匹俱已解送

軍營官兵不患無馬襄陽一帶地方平坦利於馳

驟永保等何不分派馬兵量力前進轉予賊以暇

耶看來永保等在彼竟難望其振作計惠齡此時
早抵該處着卽遵旨將永保革職解送來京交部
治罪其恒瑞慶成舒亮雖罪有差等而隨同貽悞
均屬咎無可諉並着惠齡等詳悉查明據實叅奏
至賊匪現向黃龍壩一帶奔竄該處係久經焚掠
之區賊匪無從得食勢必日形散亂惠齡到彼惟
當設法兜截速奏擒渠方不負朕委任

二十四日乙未英善勒禮善佛住奏言竊查茅坪

張家觀一帶屯踞賊匪固守抗拒時欲出外窺

伺該處山勢險峻歧徑極多必須厚集兵勇四

面兜圍方免竄逸蔓延之慮臣等因隘卡處處

需人遂飭委員等分投勸諭居民公舉義首捐

職布政司經歷衛國平考授從九品王丕承監

生田秀起桂添聰武生王家祿蕭露瀛李逢春

等十餘人召募義勇又得一千數百名以備堵
剿旋於初七八等日各卡兵勇先後盤獲奸細

崔任葵諸子文岳蘭尹明旭四名解送到營訊

據供稱逆首徐添德等見官兵逼緊將張家觀

茅坪兩處層層紮立木城外圍俱挖濠溝約深

一丈寬六七尺週圍插有鐵簽凡遇要路盡行

挖斷或於樹林內埋伏弩弓以爲防備因茅坪

一、面官兵防守嚴密，欲由普子嶺一帶衝突，遣令伊等出來探聽消息。不料被獲等供當將該犯等一一正法。嗣據義首王丕承密稟普子嶺營卡前面兩旁俱有樹林，可以埋伏。臣等思賊

匪等既緣茅坪一面官兵防堵嚴密，另欲覓路

竄出。臣等欲將營盤官兵分撥前往添防，不獨

愈分愈單，轉恐賊人窺破虛實，查前後召募本

地義民於各處路徑情形較爲熟悉是以一面密飭各營卡嚴加準備一面密派縣丞呂朝恩

千總廖廷超義首衛國平王丕承等帶領義勇

三百名巡檢朱向隆把總張應祿義首王案祿

李逢春等帶領義勇三百名各往普子嶺一帶

相度地勢分起埋伏並派義首田秀起蕭露瀛

桂添聰等帶領義勇二百名馳赴普子嶺協同

該處守卡外委周定國加意防堵臣等復派副

將富明阿都司五十六密帶屯土官兵二百名

知縣吳昇州判沈咸賓帶領鄉勇二百名赴普

子嶺後面蔣家山駐扎以爲援應詎該匪等果

於初十日午刻率衆千餘人竟向普子嶺卡隘

衝突義首田秀起蕭露瀛桂添聰帶領義勇迎

往誘敵賊匪等因恃人衆卽悉力向前該義勇

等退近卡隘轉身站立抵禦外委周定國先率
兵勇排立卡外山坡鎗礮齊發兩邊樹林內埋
伏羲勇齊聲吶喊一擁而出賊匪等慌亂敗回
縣丞呂朝恩等一路義勇繞至賊前迎頭截殺
斃賊六七十名義勇陣亡四名受傷九名餘匪
滾箐落澗往馬鞍山竄逃適副將富明阿等帶
領屯土官兵鄉勇趕到人人踴躍爭先乘勝追

趕直攻馬鞍山賊卡馬兵王陞同義首王丕承

王宋祿率領義勇十餘人首先捨入賊卡該處

賊匪見我兵奮勇直撲翻卡逃走當將賊卡燒

燬追趕數里復殺賊二十餘人時已薄暮卽撤

回馬鞍山設卡駐扎將生擒賊匪八名搶獲賊

礮刀矛鳥鎗解送前來

臣

等提訊各犯並無要

供俱卽正法梟示從優獎賞出力各義勇俾

鼓勵此次雖經剿殺多賊但臣等查看茅坪張

家觀兩處不獨山勢險要木城環列亦極堅固

須鑄大礮轟擊臣等先期酌調匠役並飭省局

製辦物料日內當可解到開工鑄造並俟續調

駐防兵丁抵營後派撥各卡隘層層圍緊用礮

轟擊賊巢分投截剿庶可集事再臣英善抵達

州後節次獲犯訊出達州首逆徐添德東鄉縣

豐城首逆冷倖俱係徐添德之弟徐添富傳習

邪教該犯自達州邪匪起事卽親往東鄉太平

勾結響應實屬罪魁當經密飭道員李鏞卽在

太平就近購線嚴拏務獲茲據該道稟稱訪得

徐添富一犯係與黃富才卿有義在鞍子坪賊

巢黃富才卿有義俱跳巖身死徐添富滾巖後

卽竄入深林經委員知縣崔特峯購線擒獲因

追拏格鬪致受重傷解致太平縣城不能訊供

傳喚本地素識之人認明屬實恐稽顯戮當卽

緝赴通衢寸磔梟取首級委員解送來營

臣等

卽令懸掛營外號令並將太平縣鞍子坪等處

賊匪均經兵勇剿除淨盡教首徐添富業已伏

誅事由出示宣布兵民無不額首稱快諒賊匪

等聞知自必愈加畏懾可期迅就殄除奏入

上命軍機大臣傳諭英善曰此次英善等奏攻克馬
鞍山賊卡並擒獲傳教之徐添富寸磔梟示所辦
實屬可嘉英善等一路官兵無多乃能設計誘賊
奪占要卡並生擒傳教首犯實爲出力英善勒禮
善佛住著賞給喜字玉搬指搬指套各一個荷包
金銀八寶各一分金銀錢各一枚以迓春祺而徵
吉兆道員李鉉副將富明阿都司五十六知縣吳

昇崔特峯州判沈咸賓縣丞呂朝恩巡檢朱向隆
千總廖廷超把總張應祿外委周定國俱著咨部

議敘馬兵王陞著拔補千總義兵首衛國平王不
承田秀起桂添聰王宋祿蕭露瀛李逢春均爲奮

勇著英善量其出力等差以六七八九品頂戴一
面開單具奏一面傳旨賞給以示鼓勵英善等自
已乘得勝之勢剋期進攻且首犯徐添富業經生

擒伏法而所鑄大礮不日亦可到營英善等當速
將茅坪張家觀賊匪辦淨移師太平上緊剿辦以
靖地方

二十六日

丁酉

福寧奏言竊

臣

剿捕黃柏山賊匪

會同惠齡觀成分路進攻奪佔九洲響溪口等

處賊卡嗣觀成於十二月初五日分兵起程前

赴達州惠齡於初八日馳赴襄陽

臣

就現有兵

力速籌進剿適值連日大雪晝夜不止道路久

爲賊人挖斷值此風狂雪積一望彌漫更難辨

路臣心不勝焦急十一日天色放晴臣卽密劄

鎮將及成德文圖等速籌辦理旋據總兵諸神

保報稱帶領守備蘇榮煥左俊等直撲令牌山

賊卡賊匪數百從卡內躍出迎拒我兵施放鎗

箭立斃賊匪一百餘人餘匪退入卡內拒守諸

神保督兵搶上山梁奮勇攻擊登時殺入賊卡

殲賊多名隨將賊人茅棚全行燒燬又據關騰

報稱派令副將張持遊擊林朝輔等先赴楓箱

坪之左於雪殘處所刨開濕土暗埋地雷又令

叅將蔣攀龍守備劉貴朝等帶兵在中腰站山

右埋伏該總兵率領候補副將許文謨守備鄧

興相候補知縣李維清等由涼風臺直搗中腰

站賊卡逆匪瞥見我兵卽有賊數百持械前來
抵拒我兵奮勇向前鎗箭齊發連斃賊匪數十
人適楓箱坪賊卡內又有四五百人趕來接應
我兵佯爲退走誘賊從後撲來俟賊至埋伏地
雷之處隨卽用火引燃登時震發轟斃多賊屍
骨皆飛叅將蔣攀龍等一聞地雷火發卽引埋
伏之兵從中腰站山右突出攔截賊匪歸路該

總兵策勵兵將奮勇迎殺賊人首尾不能相顧

倉惶欲竄被我兵痛加擊殺及墜崖而斃者不

計其數遂將中腰站楓箱坪山梁佔住臣查該

總兵等兩日內連次殺賊奪卡賊人諒已膽落

且各處雪亦漸消自應趁此機會定期合剿當

卽密行知會成德文圖等由土地嶺黃金嶂一

帶攻奪西流溪賊卡以便進取四方臺總兵諸

神保由九洲一路進攻茶園坡又派總兵慶溥
由筆架坡直上松香坪一帶進發關騰從楓箱
坪一帶進攻牛角尖均約於十五日五鼓同時

進剿

臣

親自督率遊擊多福德寧候補遊擊靳

文銓道員伊精阿知府趙秉淵等進攻確窩坪
等處賊卡山勢陡險冰凌潭滑我兵奮勇搶上
山坡卽有賊目率領數百人齊來抗拒鎗石亂

發臣鼓勵將士不避危險分投攻撲當有候補

千總陳文龍行營外委劉國富鄉勇宋金等首

先躍入賊人石卡官兵一擁而入刀矛並舉殺

死多人賊匪紛紛奔竄我兵拋擲火彈立將碓

窩坪賊卡數處草棚瓦屋焚燬燒斃賊人甚多

維時總兵慶溥帶同候補叅將董寧川等率領

兵勇由松香坪直撲金竹坪白楊坪奮勇而進

賊人不能抵禦四散奔避我兵追殺數十人奪
佔金竹坪賊卡乘勢燒燬黃連岩賊屋及韭菜

石坡等處賊人所佔房屋共一百十餘間斃賊

無數其時諸神保帶同候補都司治正恩蘇榮

煥等分爲左右兩路進發至打火磴有新扎賊

卡不虞官兵驟至措手不及棄卡奔逃蘇榮煥

縱火焚燒指揮兵勇跟蹤追殺將罈子口黃羊

坪數處賊藪焚燬諸神保因冶正恩帶兵不多
前往策應正值冶正恩左俊已將萬仞溝賊卡
奪佔賊人退至青皮堖該總兵鼓勵將士努力
攻撲又見山溝內有賊前來接應我兵奮勇擊
殺餘匪仍由山溝竄逸守備阿克東阿率同把
總周士貴等乘勝直前將黃岩窩賊卡奪獲搶
得鐵礮銅鑼刀矛因該處地勢狹窄對面又有

賊卡在上往下擲石未便駐兵仍在原卡防堵
關騰一路亦將牛角尖賊卡攻克並將附近之

大道碾盤灣等處賊卡放火燒燬至成德文圖

一路進取西流溪恐獨石坪熊子埡兩處賊人

襲我之後必須先行攻克方可長驅直入該處

山徑紆迴我兵蛇行蟻附盤旋而上賊人捨命

抗拒矢石如雨成德身先士卒鼓勵擊殺並拋

擲火彈先將獨石坪卡內草棚焚燒賊人驚慌

亂竄文圖帶同兵將兩面夾擊鎗斃矛戳者不

計其數餘匪四散隨將獨石坪熊子壩佔踞復

乘勝帶兵進撲西流溪用力攻打賊人早有準

備我兵奮不顧身直前擊殺殲斃賊匪二百餘

人搶上山梁當將賊卡奪佔次日早間正欲進

取小薄道嶺忽有賊人執打白旗分爲三路蜂

擁來援成德督率協領果勒明阿佐領額貝防
禦珠隆阿等文圖帶領候補副將朱士奉守備
王朝元等各帶兵勇分作五路並進齊打進步
連環一面迎賊痛擊一面直撲賊卡賊人捨命
抵拒成德文圖率領將備弁兵盡力奮剿自寅
至午賊勢稍怯護同知傅文炳帶領鄉勇在山
嶺用大礮對准施放斃賊數十名賊人紛紛敗

走我兵鼓勇追擊生擒賊匪劉文才等十三名

訊無要供立即正法其餘賊匪俱退至小薄道

嶺卡內我兵卽在西流溪山梁紮營佔踞臣查

此次各路官兵連日打仗於冰凌雪嶺中奮勇

進攻連奪賊卡殲斃賊匪甚多極爲出力至四

方臺爲賊巢門戶而小薄道嶺又爲四方臺屏

障今奪獲西流溪頭卡已得勝勢賊人見我兵

緊逼抗拒益力臣惟有悉心籌畫速將四方臺

奪佔設法進攻直搗中堅務期迅掃賊巢生擒

首逆奏人

上命軍機大臣傳諭福寧惠齡勒保曰此次福寧督率鎮將分路進攻奮力剿殺奪獲各處賊卡生擒賊目斃賊甚多辦理甚爲可嘉福寧著賞給金盒一個大小荷包成德等分帶官兵奮力剿殺均屬

奮勉出力成德文圖諸神保關騰慶溥俱著賞銀
絲盒各一個大小荷包所有打仗兵丁著賞給一
月錢糧以示鼓勵該處西流溪頭卡爲賊匪要隘
業經官兵攻克佔據已得勝勢想日內勒保亦可
到彼會同福寧督率官兵務將四方臺賊巢迅速
掃蕩肅清地方

同日畢沅奏言查前竄滾河賊匪因官兵追剿

緊急向東折回永保等分投追截趕至黃龍墻

張家集一帶隨殺隨進沿途殲戮甚多其餘東

奔西竄勢漸潰散從前被裹脅從之人近俱紛

紛投出臣隨時派員妥爲安撫不致復被勾結

近日永保恒瑞慶成舒亮等因賊皆散屯黃龍

墻梁家集小板橋等處地方卽於該處分布堵

剿以冀速擒首逆再臣欽奉

諭旨令將豫省征兵二千名交王文雄卽刻帶回

臣

當卽飛咨永保卽將在營豫兵撤回此內尙有

六百七十餘名先經分派各處防堵

臣

隨於樊

城營卡江西兵內抽撥換回以備鄧州等處堵

禦之用惟襄樊爲豫楚水陸咽喉其呂堰驛葉

家店一帶地方屢被蹂躪皆屬通衢驛道尤關

緊要不但目下兵單多資鄉勇之力卽將來苗

疆征兵概行撤令歸伍亦覺兵額較少卽日逆

匪殲除必須駐劄重兵以資控制容臣與提臣

鄂輝妥爲商酌再行籌辦至惠齡仰蒙

簡派前來總統軍務臣當將一切情形詳細告知業

於十九日馳赴軍營接辦一經調度周妥卽行

整旅進攻臣惟有激勵兵勇加嚴防堵以杜逸

匪竄越務期互相關會迅報捷音

同日景安奏言竊臣前奉

諭旨令將豫省征兵交王文雄帶回臣當卽飛咨永

保畢沅等調取去後茲總兵王文雄於十九日

帶領征兵七百六十四名回至豫境其經畢沅

分派各處防守之七百餘名遠近不一現在附

近者已到一百七十餘名其餘亦經畢沅撥兵

調換約計十數日內可陸續趕到臣核計原派

征兵二千名除陣亡事故並現在患病養傷未

愈四百餘名外現已到九百餘名未到六百餘

名共一千五百餘名臣會同王文雄先將現到

之九百餘名並臣原帶五百名暨分派三尖山

新店舖之山西兵於鄧州新野唐縣桐柏一帶

深視賊匪趨向隨時擇要安設營卡務期聲勢

聯絡嚴密堵截設遇賊匪竄回卽可相機迎擊

不特臣有所把握卽豫省邊境居民聞知捍衛

有資俱各仰感

聖恩益臻寧定均奏入報

聞

一十八日巳惠齡奏言臣奉

命總統軍務赴永保等一路接辦茲臣自長陽宜都

由荊州以達襄陽沿途民情極為安帖其各州

縣緊要隘口已經畢沅分派官兵鄉勇密布星羅嚴加堵截均有準備探訪賊蹤因數日內被

官兵痛加追剿復向東南竄逸分往棗陽一帶

奔逃現經永保恒瑞分帶官兵繞道迎剿但地

方遼濶道路紛岐如附近之宜城鍾祥棗陽隨

州及豫省之唐縣桐柏各州縣曲折可通而滾河等處冬令水枯處處可渡賊人東擊西竄南

截北逃毫無定所若逐一撥兵堵截不特兵勢單徒形支絀而以四通八達無險可扼之區亦難網羅密布制其死命且查目下實在兵數除陣亡傷病及撥還河南兵二千名外計存滿漢官兵一萬二百有零此內尙有分派棗陽隨州鍾祥等州縣及涇陽家臺等處堵防並安設軍臺各兵外現在兩路堪資調遣者僅止九千餘

名自應將現有各兵酌量分布仍察探賊在何處迎頭截殺無論賊匪由何處遁逃俱有分布之兵可以分抄截剿再查看地勢隨時設伏或多張旗幟作爲疑兵或故放烽烟使之疑懼總令驚魂不定蓐食不遑庶幾歸併一處既可聚而殲除卽我兵亦不虞追奔波乏其與豫省接壤各處原有景安帶兵在彼堵剿現復將該省兵

二千名撥還自可藉其抵禦無虞賊匪北竄查
襄江水而廣濶現將船隻泊放西岸賊人斷難
偷渡惟支汊之白河唐河等處皆來自豫中時
屆冬令水涸灘形淺露徒步可涉之處甚多雖
經永保等派有官兵二千名堵截但地廣兵稀
恐難兼顧自應相度地勢築壩蓄水俾令寬深
並將現有船隻全行趕泊襄江西岸一面知會

上游暫禁舟行以截賊匪西竄臣現委游擊朱

廷荃同知蕭與潔會同留防之總兵德齡等趕
緊築壩數日內即可全完再將留防官兵飭令

專堵壩口並稽查沿河水淺之處杜其偷越如
此酌量辦理較之添兵駐劄似覺事半功倍再
查賊匪所到村莊先將民房燒燬並將難民妻
子老弱拘留爲質脅令強壯者在前助勢抗拒

官兵此等被脅愚民眷戀妻孥代爲出力實非

本意前經永保出示曉諭今臣又商同畢沅廣

爲宣示曉以利害倘能及早解散尙可免其一

死予以自新一面傳檄各地方官將附近河東

各路居民俱將家口米糧移至河西卽令強壯

丁勇充爲鄉勇在岸防守如有無業貧民官爲

撫卹以免伊等內顧之憂并可激發伊等天良

盡其死力而賊匪無可搶擄自必日見窮蹙於
剿捕更爲有益第此等民人與賊匪同居鄉井

是良是莠毫無區別臣現通飭各地方官將所

有鄉勇各於衣襟內另縫黃布一塊註明該鄉

勇姓名年貌鈐用印信以昭信守設賊匪敢於

冒充鄉勇混入卡隘一經盤驗立可破露不致

疎虞其餘一切機宜臣惟有隨時隨處和衷商

摧妥協辦理以期仰副

委任臣於途次節奉

諭旨飭查永保恒瑞慶成舒亮四人內如何因循玩

悞之處並向巴克坦布阿爾達朗訥音碩雲保四

人嚴切詢問令其明白登答臣於二十一日馳抵

永保軍營當卽恭宣

諭旨永保免冠叩首伏地認罪臣屬惶懼臣遵

旨將應詢各節逐層向永保並恒瑞慶成舒亮巴克
坦布阿爾薩朗訥音碩雲保等嚴切詰問均據
一一登答謹另繕清單恭呈

御覽並卽遵

旨將永保革職派令直隸副將凝德解京交部治罪
外至永保因循玩悞之處臣自入襄境後接見

文武各官卽留心訪察茲抵軍營復密詢各將

士等均稱永保辦理尙無遺悞之處臣未敢遽

行深信查永保等自到軍營以來景安卽在河

南界上互相策應其有無因循玩悞景安見聞

自較切實臣現留心訪查並密札景安囑其將

實在情形速行知會如果相符卽行會同據實

奏

聞不敢稍有徇隱

同日勒保奏言臣帶兵行至爆木營地方接奉

諭旨以四川達州太平東鄉皆有賊匪滋擾令卽取

道馳赴會剿臣當卽取道秀山酉陽一路馳赴

達州會同宜綿英善詳細熟商分投剿辦現帶

官兵一千四百名臣卽率同叅將施縉都司褚

大榮唐朝臣等迅速遄行以期趕緊剿蕩均奏

入

上命軍機大臣傳諭惠齡福寧勒保景安曰惠齡奏
馳抵軍營接辦軍務一摺仍不過布置情形尙未
接仗殺賊雖所陳籌布各事宜尙爲得計但究未
見大加振作此時賊匪仍竄聚黃龍壩一帶該處
前經被賊蹂躪村莊糧食焚掠一空賊匪在彼無
從覓食勢必復思竄逸他處惠齡務當於扼要處
所一面嚴密防堵一面繞至賊前四面兜剿無難

悉數撲滅斷不可又事尾追任賊奔竄疲我兵力
又據奏詢問永保及恒瑞等供詞裏樊一路雖係
永保總統而恒瑞慶成舒亮等俱漫無贊畫隨同
貽悞此時自亦無顏專諉咎於永保一人且閱永
保等供單內稱賊匪於初一日奔竄魏家集見該
處有官兵營盤恒瑞舒亮等繼至賊匪退至泰山
廟等語賊匪既向北竄將魏家集焚搶其勢已張

該處距景安營盤甚近景安處僅有兵四百名一
望而知底裏賊匪有何畏懼不敢往北轉折回西
南竄逸況前據景安所奏賊已圍繞營盤至一日
之久而然後退去次早卯刻恒瑞舒亮始帶兵到彼
是賊匪初一日在魏家集滋擾因見景安營盤不
動於昏夜時恒瑞等未到之先卽已向東南退去
迨初二日卯刻恒瑞舒亮趕到賊已退至魏家集

東南十餘里外何得捏稱恒瑞舒亮帶兵到彼賊
始南竄此等情形豈恒瑞舒亮以朕尙未知可以
捏飾支吾耶且幸而賊尙無能不直撲景安營盤
倘賊抵死圍繞至曉不退恒瑞舒亮尙能趕到救
援而永保慶成遠在南路全無接應設有疎虞成
何事體除永保業已解京俟解到詢問外着惠齡
卽先向恒瑞舒亮慶成嚴切詰訊並將伊等所供

因何與景安前奏不符之處詳悉詢問具奏至惠
齡甫經到彼其將弁等俱係跟隨永保之人卽向
訪詢亦不肯據實和盤托出景安在彼見聞自確
且節次所奏賊匪東奔西竄官兵惟事尾追致新
到勁兵又形疲乏情形雖未明白叅奏而言外已
將永保等貽悞之處全行透露此事竟着交景安
將永保何以漫無調度及恒瑞慶成舒亮等如何

隨同貽悞孰重孰輕及賊匪到魏家集後因何南
竄之故逐一查明據實覆奏想景安旣經具奏於
前斷不肯自相矛盾又思取和見好稍有瞻徇也
又據勒保奏在途次接奉諭旨卽取道四川秀山
一路馳赴達州前因達州教匪滋事諭令勒保赴
彼協剿嗣因該處有宜綿觀成前往而長陽一路
祇有福寧一人續經降旨令勒保不必前往達州

卽於途次速赴黃柏山計勒保接奉後旨時尙距
楚境不遠自卽取道回至該處目下將次到彼黃
柏山之賊竄守一處覓食維艱福寧業經奪獲賊
卡多處緊逼四方臺要隘已破勒保務須扼要防
堵截其下山竄逸掠食去路以期速擒首逆斷不
可又令逃往他處爲要